

Der leist Banechto

Banechtn ist bider kemmen, ont i pin do as de gea' van an zimmer as n ònder a'ne za bissn bos as de suach.

As n kassabank hòt's an òltn spiegl, i nimm en, setz me as n pett ont schaug me u.

S mai' hor ist gònz bais, de zepfler sai' òlbe dinner, de mai' haut ist asou pfizzt ont pòzlet as i hòn me darschrocken za sechen me, de ang tiaf anin en kòpf, loade ont mia, mia abia de mai'na tschòttn as bell me nea'mer trong, mia abia de mai'na hent as tea'mer bea, mia abia der mai' kòpf as vil vòrt gadenkt er nèt bos as de gatun hòn vour zboa stunn.

Ober s mai lem vargèsster nèt, sèll ist òlls nou drin, van òlls sèll as de tsechen hòn do en doi' haus hòn i nicht vargèssn.

S sai' schoa' seicks jor as de leb aloa', darno as der mai' mònn storm ist ont de kinder sai' òlla gahaiertn.

S sai' seicks jor as en Banechto plaib i semm tsetzt as a karega ont de mai'na agn schaug keing de tir, ont de tir plaip òlbe zua, van drai kinder as i hòn as de bèlt galeik nea'met kimmmp mear zua, de song as de nèt bail hom.

Haier pin i za schbòch za kochen, asou berme mer lai a ker vrigaler va nachtn, beil as de èssn tua schaug e me omanònder, s pareart mer za sechen semm en an kantandl en presepio as de òlbe zòmmen pet de mai'na kinder gamòcht hòn.

Drau as n tisch va der stub sich i nou s pa'mbl pet de kloa'n liachtler ont de kinder as hom mer gahòlven za richtns au, der hom nèt vil zaich gahòt vavai der sai' òrm gaben, ober s ist gleich schea' gaben.

En Banechto de kinder sai' austònnen en òlla de vria, de hom de gònz nòcht nèt tschloven gahòt, i ont der mai' mònn sai' nou en pett gaben benn as der hom sa gaheart oas' no en ònder pahenn en de stub gea' za

schaung menn s Kristkinndl hõt n eppes prink gahõt, ont òlbe hom sa eppes pfuntn.

Endarbeil hòn i garift z èssn, abia groas as der pareart hait der doi' tisch ont viavl dinger as der tannt song menn der kannt klòffen.

Der hõt ens tsechen èssn òlla zòmmen, der hõt ens gaheart lòchen, rearn ont vil vòrt gor straitn, er hõt aa tsechen, abia i, òlla de lait as sai' do galep ka tir aus gea', iaz sicht er me lai mi ont er aa abia i bart se hearn aloa'.

laz pin i mia, i gang gearn za ròstn ober i kòn nèt, i muas do plaim, de mai'na ang schaung òlbe de tir, i bòrt....

I bòrt de mai'na kinder as au tea' de tir, i bòrt as de gadenken as ist Banechtn ver mi aa, i bòrt as de kemmen za vinnen me gor iaz as de nicht mear bèrt pin, i bòrt...

Endarbeil is pòll tunkle kemmen, ont en haus is a ker kòlt, s vaier en de fornesèla ist o'storm, i miat s es bider u'mòchen, ober i pin sbòch ont mia, asou leig e mer a schial va boll as n puckl ont plaib do za ròstn.

I leig abaus en kòpf as n tisch ont tua me entschlòven, no a ker parearts mer za hearn teckln, i stea' pahenn au, s mai' hèrz òmbiart za mackn stòrch, i hòn gamoat as oa's oder s ònder van kinder kemmen ist, ober as n solder ist nea'met, lai an òst van houler as mackn tuat kan an scur au, s hõt an seicketen bint.

laz sperr e zua de tir, dòn vòrt pet n schlissl, iaz muas i me lai leing en a rua, haier aa kimp bider nea'met zua.

S ist pesser as de leig mer inn a bòrma scaldina, ober i boas nea'mer bou as de galeick hòn sa, gor der mai' kòpf vil vòrt lòt me aloa'.

Beil as de suachen tua, kimp mer eppes scheilens en kòpf: bart s bor sai' as i kinder hòn? Oder bart s lai sai' der mai' kopf as mòcht mer s glam?

laz pin i varzok, i hear me varluorn ont loade, s pareart mer za bissn nea'mer bos bor ist ont bos nèt.

I tua zboa tritt za setzn me as n pett, an ag vliacht mer as n kòstn, bou as hòt a graoa'sa skòtl va karton, pet n pesn ziache sa giatla oar ont tue sa au.

Vil òlta dinger hòt s do drin, òll stickl mòcht mer gadenken eppes van mai' lem.

En a stròtz sai' drinn de lampler, de hirtn, s kristkindl van presepio, s vallt nicht, s ist òlls nou do.

En a klea'nera skòtl sai' de liachtler van pa'm ont s veigel as der galeick hom as biff.

I schau mer u a stickl as de vòrt ont leig s es as n pett.

En poun va der skòtl, inngarirt en a kòrt, hòt s an ettlena òlta letratn, as n earst pin e drau i, der mai' mònn ont de drai kinder, as an òndern sai' ber bider òlla zòmmen en an Banechto' um en Kristpa'm.

De zachen òmbiarn za kemmen mer ka zicht oar, i hòn gamoat za hom koa'na mear, ober hai' pin i abia an prunn, ont iaz s mai' lem ist gònz vour de mai'na ang, i sich de kinder as matere tea', i hear sa lòchen ont rearn, i sich sa groa's kemmen ont gadenk òlls.

I denk benn as de hom se gahaiertn, benn as i pin nou stòrch gaben, ont òll sunta hòn i kocht en vormes ver òlla ont òlla sai'sa kemmen za vinnen me ont benn as de eppes praucht hom, i hòn en òlbe gaholven.

An to no en ònder pin i òlt ont sbòch kemmen, asou hòn i bea'ne mear kinnt tea', i hòn òmbiart za hearn minder, za klòffen pet miar hom sa gamiast schrain, vil vòrt hòn i vargèssn sèll as de keing hom mer, asou hom s e mer gamiast voursn de dinger mearer vòrt ont sei sai' òlbe minder kemmen.

I leig me anin en pett, s mai' hèrz ist schbar, i tant gearn schloven, ober i kònn nèt, asou ombiar i za petn.

I so vargèlzgott en Gotterhear as der hòt mer gamòcht vinnen de skòtl as hòt me òlls gamòcht denken, iaz boas i as de pin nèt a tschlèchta mama

gaben, iaz boas e as de hòn s a òlbe gearn gahòt ont finz as de kinnt hòn, hòn i gatun ver sei' òlls sèll as de guat gaben pin.

I pet en Gotterhear as de mai'na kinder , benn as de barn sei aa òlt sai', kemmen nia aloa' galòt, as de selltn nèt proviarn sèll as de sei hom mer gamòcht proviarn en miar ont as de sai'na ang sellt n nèt souvl rearn.

I pet en Gotterhear as de mai'na kinder, gor va òlt, selltn hearn as de nou eppes bèrt sai', as de Banehtag de sai' tir nia sperrt plaim tuat, ont as de selltn nia en pett miasn gea' pet n hèrz as bea tuat abia s mai' hai'.

I pet as, benn as de barn se òlt ont garift hearn, as de selltn òlbe hom oa's oder s ònder as gip n a hont, as de sai'na oarn selltn òlbe hearn a guats bourt, ont oa's oder s ònder as sok n :— I hòn de gearn!-, as benn as de sei aa toaret kemmen, as de selltn vinnen lait as klòffen a ker rinter a'ne za mòchen s beng ont as tea' sa lisnen gor benn as de glaichen dinger song mear as a vòrt.

Dòs ist sèll as de vours en Gotterhear ver de mai'na kinder ont dòs ist sèll as de gabellt hat ver mi aa, mear hat i nèt praucht.

S leist gapett ist ver mi, - Gotterhear, mòch me nea'mer bòrtn, schau as de mai'na ang selltn sperrt plaim abia de tir van mai' haus ont pet n doi' gapett ist der mai' leist Banechto garift, de mai'na ang barn nea'mer rearn ont i prauch nea'met mear bòrtn.